

## **Sauniga o le Faaeega o le 'Au'au (Falealuga) o le Maota Fono Fou o le Palemene i Mulinuu**

O le Aso Lua, 12 o Setema 2017 na faia ai se sauniga aloaia i le nofoaga o lo o fausia ai le Maota Fono fou i Tiafau, Mulinuu, e aloaia ai le faaeega o le 'Au'au o le Maota Fono fou.

O le Susuga Rev. Iamafana Faauga na saunia le tatalo e amata ai le faamoemoe. O le saunoaga autu, na faafetaia ai e le Afioga i le Palemia, Hon. Tuilaepa Dr. Sailele Malielegaoi le fesoasoani ma le soosootauau o le Malo o Ausetalia i lenei poloketi. Na ia taua foi, o le auai ai o le Malo o Ausetalia i lenei poloketi, o le a mautinoa ai le tulaga lelei ma maoae o le Maota Fono o lo o fausia. Na ia saunoa foi, o le laasaga ua mafai ona ausia o le galuega, o le tali lea o le tatalo a le Malo faapea le atunuu atoa.

O le Afioga i le Sui Fofoga Fetalai, Tofa Nafotoa Talaimanu Ketu na ia tauaaoina atu le teu fugalaau i le Susuga ia Francis Craig, o le Pule Sili o le Konekarate o lo o fausiaina le galuega (Craig Construction) mo le faaeina atu i le tauluaga o le Maota. O le faailoga, o le ausia o lea laasaga taua e tusa ai o tu ma aga o faatufugaga a Samoa.

Na auai foi i lea sauniga le Afioga i le Sui Palemia, Minisita o le Kapeneta, Komesina o Ausetalia (Sue Langford), Sui o le Komiti o Tauofoga a le Malo, Sui o le Konekarate o lo o taitaia le galuega (Manteena Security Limited) faapea le Komiti o lo o mataituina le faagasologa o lenei galuega tele.

O le ata ma le fausaga o le Maota Fono fou o lo o tuufaatasia ai fausaga ma faatufugaga faa-Samoa ma fausaga o maota faaonaponei. O lenei poloketi ua mafai ona faatinoina i se faigapaaga i le va o le Malo o Ausetalia ma le Malo o Samoa. O le ogatotonu o le tausaga 2018, ua faamoemoe e maea ai lenei galuega.